

DOMENIE II DI AVENT

Antifone di jentrade cf. Is 30,19.30

Popul di Sion,
il Signôr al vignarà a salvâ i popui
e al fasarà sintî la sô vôs tremende
pe gjonde dal vuestri cûr.

No si dîs Glorie a Diu.

Colete

Diu onipotent e bon di cûr,
fâs che nissune robe di chest mont nus inderedi
te nestre corse viers di to Fi,
ma la scuele de sapience dal cîl nus fasi mertâ di spartî la sô glorie.
Lui che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 11,1-10

Al judicarà i puars cun justizie.

Dal libri dal profete Isaie
In chê di, un sfiol al saltarà fûr dal tronc di Jesse
e une menade e vignarà fûr des sôs lidrîs.
Sore di lui si poiarà il spirt dal Signôr,
spirt di sapience e di inteligence,
spirt di consei e di coragjo,
spirt di cognossince e di timôr dal Signôr.
Al cjatarà la sô contentece tal timôr dal Signôr.
Nol judicarà seont lis aparincis
e nancje nol fasarà sentence par sintût a dî;
ma al judicarà i misars cun justizie
e al cjaparà decisions justis pai puars de tiere;
al pacarà il prepotent cu la vuiscje de sô bocje
e al fasarà murî il trist cu la soflade dai siei lavris.
La justizie e sarà la fasse dai siei ombui
e la fedeltât la cengle dai siei flancs.
Il lôf al vivarà insiemi cul agnel
e la pantere si distirarà insiemi cul cjavret;
il vidiel e il leon a passonaran insiemi,
un frutut piçul ju menarà.
La vacje e l'ors a passonaran,
i lôr piçui si distiraran insiemi,
il leon al mangjarà stranc a usance il bo.
Il frutut di tete al matearà su la buse dal sarpint
e il canai al metarà la man te cove de lipare.
No si fasarà mâl ni dam di sorte
sun dute la mê sante mont,
parcè che la tiere e sarà incolme
de cognossince dal Signôr,
come che lis aghis a cuvierzin il mâr.

In chê di al sucedarà
che la lidrîs di Jesse
si alçarà sù tant che bandiere pai popui;
i forescj a coraran viers di jê,
e la sô cjase e sarà plene di glorie.
Peraule di Diu.

SALM RESPONSORIÂL dal Salm 71

R. Ven, Signôr, re di justizie e di pâs.
Diu, dai al re i tiei ordins,
al fi dal re la tô justizie.
Che al rezi il to popul cun justizie,
cun onestât i tiei puars. **R.**

Che e florissi tai siei dîs la justizie
e pâs in bondance,
fintremai che no si distudarà la lune.
Che si slargji il so ream di un mâr a di chel altri,
dal flum fin ai confins de tiere. **R.**

Lui al liberarà il puar che al clame jutori,
il biât che nol à nissun che lu jude.
Al varà remission dal debul e dal puar
e al quartarà a salvament la vite dai biâts. **R.**

Che al duri il so non par simpri,
il so non che al duri denant dal soreli.
Che a sedin benedidis midiant di lui
dutis lis gjernaziis de tiere,
che lu disi furtunât dute la int foreste. **R.**

SECONDE LETURE Rm 15,4-9

Jesù Crist al salve ducj i oms.

De letare di san Pauli apuestul ai Romans

Fradis, dut ce che al è stât scrit prime, al è stât scrit par istruînus nô, di mût che cu la pazience e cu la consolazion che nus vegnin de Scriture o podìn vê la sperance. Il Diu de pazience e de consolazion us dedi di volê, tai vuestris rapuarts fra di vualtris, lis stessis robis sul esempi di Jesù Crist, di mût che cuntun cûr sôl e cuntune bocje sole o glorificais Diu, Pari dal nestri Signôr Jesù Crist.

Par chel acetaitsi in amicizie un cul altri, come che ancje Crist nus à acetâts nô a glorie di Diu. O vuei dí che Crist al è diventât servidôr dai circoncidûts par mostrâ che Diu al è di peraule e al à colmadis lis promessis fatis ai paris; i paians invezit a glorifichin Diu pal so boncûr, come che al è scrit: “Par ches ti laudarai framieç dai popui, o laudarai il to non cu la cjante”.

Peraule di Diu.

CJANT AL VANZELI Lc 3, 4.6

R. Aleluia, aleluia.

Prontait la strade pal Signôr,
splanait i siei trois!

Ogni om al viodarà la salvece di Diu!

R. Aleluia.

VANZELI Mt 3,1-12

Convertîtsi: il ream dai cîi al è dongje!

Dal vanzeli seont Matieu

In chei dîs al capità Zuan il Batiste a predicjâ tal desert de Judee, disint: «Convertîtsi, parcè che al è dongje il ream dai cîi!».

Di lui al fevele il profete Isaie, là che al dîs: “Vôs di un che al berle tal desert: prontait la strade dal Signôr, dreçait i siei trois!”.

Zuan al jere vistût cuntune vieste di pêi di camêl, peade tor dai ombui cuntune cinturie di piel; il so mangjâ a jerin zupets e mîl salvadie. A rivavin di lui int di Jerusalem, di dute la Judee e di dute la region ad ôr dal Jordan, e si fasevin batiâ di lui tal flum Jordan, confessant i lôr pecjâts.

Viodint a capitâ une vore di fariseus e di saduceus par fâsi batiâ, ju tacà disint: «Raze di liparis! Cui us aial insegnât a cirî di scjampâ a l'ire che e sta par plombâus intor? Fasêt duncje oparis di vere conversion e no stait a iludisi disint: O vin Abram par pari. Parcè che us dîs che Diu al è bon di fâ saltâ fûr fîs di Abram ancje di chescj claps. La manarie e je za su lis lidrîs dai arbui; cussì ogni arbul che nol fâs pomis buinis al ven cjonçât e butât tal fûc. Jo us batii ta l'aghe par che si convertîs; ma chel che al ven daûr di me al è plui fuart di me e jo no merti nancje di quartâ i siei sandui. Al è lui che us batiarà tal Spirtu Sant e tal fûc: al à te man la pale par netâ il so curtîl; al ingrumarà il so forment sul cjast e al brusarà la pule cuntun fûc che no si distude mai».

Peraule dal Signôr.

Si dîs O crôt.

Su lis ufiertis

Lassiti bonâ, Signôr, des preieris e des ufiertis
che ti fasìn te nestre puaretât,
e là che no rivin i nestris merits, che no 'nt vin,
vegninus incuintri cul jutori de tô misericordie.
Par Crist nestri Signôr.

Antifone a la comunion Ba 5,5; 4,36

Jeve sù, Jerusalem e metiti adalt:
viôt la gjonde che ti ven dal to Diu.

Daspò de comunion

Sostentâts cu la bocjade che e nudrîs la nestre anime,
ti preìn, Signôr, di insegnânus,
midiant de partecipazion a chest misteri,
a pesâ cun sintiment lis robis di cheste tiere
e a tacâsi a chês dal cîl.
Par Crist nestri Signôr.